

懷舫詩別集目次

卷之一

感懷三十八首用唐陳拾遺韻

和古詩十九首

和八詠

九歌

卷之二

詠鏡二十四首

卷之三

閩漳竹枝詞一百首

卷之四

鴈字迴文三十首

卷之五

詠物詩二十首

藥名詩四首

閱世詩八首

卷之六

江南竹枝詞一百首

懷舫詩別集卷之一

感懷三十八首用唐陳拾遺韻

殘陽入西極旭日更東昇晚霞唯漸斂朝露亦暫凝人  
生終日暮霸王互息興眼底卽萬古百代信可徵  
春色至無跡平蕪看遍青泉下幽眠人焉知芳草生逝  
水鮮息機潮信無心成白頭會道晚寂歷紫芝莖  
迷陽趨滯雨茫茫塞長途之子失故步首尾顧一軀培  
風翼南徙追日悞東隅連城壁揮手忽如棄隸奴蹇蹇  
大行下登頓吾踪孤

樂羊食愛子仁者薄其功石碣甘滅親春秋表厥忠毀  
譽殉世口得失昧塞翁誰能適吾適以無名形終



蟄虫驚啟凍醢雞畏發蒙宇內一覆奎陽光徹始終安  
知重泉下此日不常中反復問元化天運無時窮  
天地生物久未見銷其精大氣運無息無能闕其行人  
心至微渺乃與清寧并大明藏於密至理蘊幽冥不得  
已爲言垂示十二經耳食空今古罕覩餐菁英  
事變日紛然眼中吾老矣不能知有終焉可語無始蟬  
蜉朝暮間一生混沌耳此物乃大知絕勝赤松子  
人間覈功罪理固通幽冥善惡餘殃慶謂可盡死生不  
聞龍比魂爲厲振冥冥逝者胡不悟大義胡不明迭與  
湯武師仁人成其名死矣復何知恩怨想盡停  
聖人崇仁義莊老謂非真託言懸解中乃是遁刑人西

來微妙諦一切入果因一身爲幻夢更何有君親誰是  
皈依人蕭梁與姚秦此時舌生華羣言亂如麻  
鼎鼐制器後幾許不顛顛啞人虎耽耽鑠金口凝凝唇  
齒乖寒煖舌柄獨捺持長堤決以鼠大地破於錐孔棘  
已千古寧止在一時

吾重陳拾遺寸毫掃塵氛堅白異同外青天披亂雲儀  
秦揣摹中放眼識神君大哉鬼谷書表裡李孔文所學  
本古易知二妙合分變化終歸一聳然諸子羣  
寒谷映日暖朔風得春和雨露滋濡久小草方成科十  
年遲樹木樹人復如何貧家有季女充選得綺羅入宮  
卽遭斥不合畫雙蛾上林同根木成柯便伐柯



明月四時有獨憐秋倍清由來難意遠強半惹愁生圓  
處多傷別虧時又望盈明月無今古人情古不平  
大道直如矢之子行悠悠徒以踽涼意學人工旋周百  
反終一蹶躓堙非崇正詭遇固有道舉足已封侯  
貴人易苟悅所患歡須臾彼將克錦犧我已喪玄珠信  
陵屠漿友相交亦市徒冥鴻依彼臯傭保老姑蘇五月  
披裘者心應厭五湖

高義隨時盡游俠事已難縱橫託意氣反覆相詒謾煉  
成繞指柔乃可鑄越干躍冶不祥物何門堪結歡豪華  
銷帝杜歌舞散邯鄲饑驅無家季倚劍發長嘆

樂土托泉郡心交結麴生於中有佳致此鄉無與爭浩

歌狎狂楚

羸悠然埋糟止自擬得九京謀婦

悵莫應瓶罍罄縱橫旋移乞米術將吟賃酒行客教灌  
將軍厨空阮步兵無門求一醉非願獨常醒中山歸去  
來幾何千日哉

天命會尔厄吾道能誰窮不求監河水不拜大王風一  
寒烏足鄙故人真俗子寒士若能容秦無張相公

鑿凶秉律出大命託元元乘軒不解戰肉食烏足論卿  
材讓上將詩禮重說敦勇非憑暴賈威寧弧矢尊沙場  
陰雨夜鬼哭聲冤煩萬命博一戾功名豈久存長安歌  
舞月遺照邊塵昏

慨煉古燕趙舊俗漸蹉跎猶有信陵容悲歌喚柰何馮



尉墳沙草蕭王臺黍禾酒徒久零落空存金叵羅

馮唐墓在

趙州南光武帝千秋臺在高邑

苧蘿山下女顏色趣瓜期選入長門閉愁痕上翠眉舊日採桑侶抱子已多時未識君王面象床空繡帷

日近長安遠白雲是帝鄉有花專向日有鳥慣隨陽風雨何蕭索山川竟混茫棲卑難極目涉險漫褰裳客逐齊館玉工悞楚王讀書真細事無術救羊亡

幽庭花欲謝風雨正浸淫濕雲棲短簷鳴鳩在幽林汝身生羽翼高飛有碧岑胡為屋角啼亂人洛下吟

永雪迫歲晚羽檄急徵兵河水結堅橋烽火照危城大將提精銳臘盡風雷生逐奔遠出塞深入戎羌驚擒者

獻千俘戮者游九冥功業麒麟畫聲靈霹靂行當陣名王獲鎬勲雪嶺平公侯歸衛霍儀衍空縱橫

塞外單于避亭前醉尉強時命既不偶家聲竟陵夷功罪人奴制死生獄吏持一侯悞將軍甘為造物欺

總髮誦詩書蚤有貧賤患富貴亦偶然憂虞橫相干急難仗友生生死久結歡一朝時勢變蓬心悔蘭言刎到終按劍刻覈入肺肝安能絕物游友道堪悲酸

豐州有荒塚枯草不復青幽怨久已歇奚能發菁英旁多戰死骨長夜同暝暝浮生成長物驀然悞櫻寧

鴻雁南北鳥未審擇棲林少年志功業焉屑藏黃金傾家博斗印伏劍天山陰血漬熊皮韉涕殷翠羽衾不俟



無返日白髮迅追尋繁弱雖在背寧忍射歸禽  
儒冠者誰子皓首惜殘春甘委溝中段羞言席上珍著  
書飽蠹魚懷寶重鼎鈞市僧羣登壘誰憐待價人  
北窓倚修竹風月助清姿醒我黑甜夢違君零落時連  
昌宮裏滿碧筍遊丹墀舊刻依然在飄搖動客思  
車魚羞國士仁義集侯門久開有間隙古多無妄冤夙  
昔萬間厦寒士無地存一朝嗚吠散心跡伏孰論竹貴  
持高節泉應飲清源嗟嗟四公子結客何足言  
壯顏消無跡青鬢忽就衰尚尔多憂患其如更別離不  
辭棲枳棘焉能效鷓鴣放眼觀身世誰盈百歲期勞勞  
西馳日不待衆蚩蚩因知游仙夫長往無還時

閨餘留節序初夏薄寒欺曉山明鏡裡嵐影入雙眉已  
侵梅兩候未過麥秋時羅衣殘篆冷紈扇黯塵淄何事  
衫襟際深痕染涕洟

江城誰弄笛陌上麥逢秋客子辭鄉縣孤吟王粲樓北  
望黃金臺荆田皆舊游近學老莊放冥然忘息讎行將  
去江海奔走甘涼州年華日益邁道路日益悠人爲李  
廣嘆我逢鄧禹羞長城埋萬骨生還幾徹侯

遭刑無贖王欲殺乃真才松老方學偃偃倭雜草萊昨  
聞天子詔重起栢梁臺十圍直幹者何由自炫哉棄茲  
烟霞秀霜雪靜塵埃

車後擁千騎堂前列十眉天子勞朝罷羣公省沐期掩



關病幾日枕席泣漣洏願以萬鍾祿商山易紫芝遺表  
拜宮殿秘器錫龍螭青史他年事君無更問之

家隣古襄國數上趙叢臺太行接秦晉霸圖昔壯哉泰  
山青遠接漳水自西來其人骨久朽臺觀空崔嵬銅雀  
無遺址荒烟遍草萊

豪吟發孤憤清酒全太和圓缺隨蟾影寒暄看雁過清  
明歸志氣事物紛剉磨知命樂天者窮通如我何

和古詩十九首韵

行行重行行千古此別離繫馬山之隈維船水之涯別  
情難復道幽恨會相知飄葉辭同林鳴禽違故枝傷別  
何近遠日月無停緩遊子有時歸年華去不返年華亦

日新佳人顏色晚酌子盡離樽飽我青精飯

青青河畔草黯黯堤邊柳柳絲繞晴原草烟凝綺牖千  
里終極目孤亭一揮手塞外築降城樓中老思婦不及  
杏梁燕成巢甘共守

青青陵上栢盤根入白石材木被文繡天子登臺客下  
奏宮懸樂上有風雲薄念此磷砢骨宛隔河與洛旌節  
山中來幽澗深求索待築建章基輦致帝王宅鬼斧闢  
雲窠孤根拔百尺萬年靈秀斷知爲世事迫

今宵良宴會明曉迹已陳嘆息古人往黯然今傷神後  
來復追弔當境誰爲真悠悠重泉底委曲常難申往還  
市朝客方糾車馬塵黃扉朝侍漏丹旒夕通津人生樂



幾許不敵長悲辛

西北有高樓樓高星斗齊簷垂銀漢尾檻埒三臺皆清  
風透簾幕似奏商音悲芳草別驕馬閒雲瑣艷妻賓鴻  
送來去皓月入徘徊愁中無短漏笛裡有餘哀一曲朱  
顏改三秋歸信稀鴛鴦七十二池上自雙飛  
涉江採芙蓉不及佩萱草草木寧忘憂夢繞關山道路  
遠客悠悠腸迴江浩浩曉窓拂鏡塵一照一回老

明月皎夜光中宵移廊壁照我虛堂白几屏何歷歷寒  
露冷凝珠鳴蟲屢徙易枕簟常自溫反側寐無適吹笳  
驚宿雁高飛響勁翮過我留哀音雲陰絕影跡默念爽  
歸期駕言脫輓輒怨嘆遠莫聞憔悴終何益

冉冉孤生竹鳳去守巖阿空羨喬松上高枝接蔦蘿生  
女嫁及時願尔室家宜委棄復何道愁吟邁遠陂鳳兮  
棲何暫實兮結已遲不如桃李華春前藉日輝不如蘭  
蕙草霜中早卸萎甘奈歲寒久枯寂竟奚爲

庭中有奇樹雨露厚培滋贈君不忍折動我西周思美  
人忽已沒十年久樹之風霜摧莫急應念植根時  
迢迢牽牛星不能慰怨女天上夜如年何時謝機杼涓  
滴清霄淚飛洒成秋雨終歲隔銀漢歡聚寧幾許人間  
兒女情莫更雙星語

迴車駕言邁西上橫門道浩浩流沙鳴霜原無寸草同  
行多戰死者皆衰老曾未當單手封侯焉得早生還



舊朋稀問年鮮壽考一死誰能道丹砂希世寶

東城高且長城中半親屬漸次聞凋喪夙草墳原綠天

運無息機化物本神速勞生苦多端鬼伯相迫促樂遊

及芳晨世事謝拘束跨下馬如龍屏中人似玉萬金結

一客千縑酬終曲莫避飛觴催但願繁絃促提劍動激

昂泰山輕躑躅所仇既已雪化鶴歸海屋

驅車上東門近郭王侯墓枯松傍祀堂斷碑橫神路烏

噪野田空狐邀荒原暮常聞達生言生死同寐寤死為

泉下泥生寄花間露一朝得富貴百慮求堅固終有大

力者鑿壑負舟度墓中人有知黃金鑄錯悞穆然得澄

觀托意在毫素

去者日已疎遠鬼復何親人無百歲壽原少千年墳故

家喬木盡幾能常負薪陋巷鶉衣士翻為朱紫人旨哉

晏子語廢者興之因

人生不滿百中多病與憂老少皆衰弱盛年幾壯游冉

冉去良時曠曠已如茲偃蹇時賢避支離後進嗔何當

獲大藥遙共仙夫期

凜凜歲云暮永雪窮簷悲力田幾多稼作客賦無衣未

見縱橫就徒憐温飽違五侯千金子裘馬散光輝高駕

駐倡樓僕御倦持綏日夕邀所歡招搖載同歸沙堤炬

火列廣筵屏幙圍舞浸香汗濕煖迸玉觴飛焉知寒谷

裡卒歲望陽晞酒醒催高宴柴門雪壓扉



孟冬寒氣至北地倍凜慄計吏公車動貢物羣戾列庭  
實備珍奇獨有人才缺緼袍者誰子高門投短札獻策  
積連棟無暇爲鑒別尚有曳裾儒懷中字磨滅才難知  
更難好惡衆必察

客從遠方來都市見錦綺十旬成一端女紅傷如爾剪  
緣商婦履裁作倡家被織者不能衣衣者織不解逸勞  
問鼠牛萬事常類此

明月何皎皎偏照獨眠幃庭樹烏啼夜空階自徘徊凌  
晨雙飛去薄暮一雌歸衆雛還自哺相將更望誰感是  
思征客含悲在擣衣

登臺望秋月和八詠

望秋月秋月入秋清玉繩低繫影金井靜鋪明明月無  
今古秋光多媚嫵下照碧梧枝上照白榆樹浮雲歛盡  
紫霄寒銀河傾瀉苔堦露起笙歌於廣榭來哀怨以高  
樓催萬家之砧杵冷寡婦之衾裯長門嘆玉關愁蛩吟  
砌雁鳴洲風霜征客西涼外歌舞娼家南市頭揮暮霞  
而進上留殘漏以徐催東井升而盡望西巖墮以難回  
烏繞林以三匝蚌泊波而半開暈如垣兮蟾窟桂有子  
兮仙胎孤鶴眠多警空房怯自猜心耿耿以不寐夜綿  
綿而難曉投素壁於圭門印明珠於圓沼入澄潭而倍  
清傍高山而忽小顧隻影之伶仃下烟絲而繚繞天氣  
涼如水秋雲薄似羅當頭寧有幾把酒欲誰何客館愁



明月中宵白髮多

會圃臨春風

臨春風風蕩河橋柳梅花消雪餘芳草鋪茵後採芹春  
水畔水岸碧苑新綠樹飛金彈清波照麗人驕馬嘶香  
車動婿乘龍女跨鳳競訪樂遊原花林晴日暄淑姬遂  
下閣志士竟窺園修禊旋裁綺懷春雅佩萱錦叢方調  
笑紅雨行憑吊妾漸減容光花常增窈窕晶簾玉鏡臺  
冉冉非年少披香辨泣朱英愁遣落夢遭驚綿蠻啼鳥  
閒長晝歷亂飛花迫五更梅子陰濃苑花浪暖畫梁燕  
到雙雙香涇舟歸緩緩清明將屆寒畱上巳已過春晚  
駕稅旗亭住醞雉飛麥隴豐年野菜花香似蜜嫩荷葉

小如錢天氣惟宜醉風光最可憐珊瑚鞭琥珀酒羅敷  
女秋胡婦試委佩於萑蘭或修儀乎瓊玖騰豪氣於五  
陵逞壯遊於四牡潔寒機之素絲守中饋之敝帚蘭亭  
觴詠歇玉樹舞歌殘紫禁傳新火黃鑪散舊歡人增今  
歲老花待隔年看

歲暮愍衰草

愍衰草衰草舊春蕪枝葉嚴霜盡根芟野燒枯窟亡憐  
顧兔尾掉竄雄狐落木同正壑飛蓬逐道塗動老驥之  
長鳴集哀鴻而鍛羽接枯涸之浮沙迷暮雲於寒雨勢  
靡靡望茫茫廣牧地開獵場疾風蕩爲長磧苦月臨如  
大荒鹿呦呦以鳴野駒皚皚而出疆王孫歸兮無芳草



芳草瘁兮生迷陽浸秋水之瀰漫觀馬蹄而散亂承積  
雪於岡前結薄冰於湖畔遙思今昔頓有盛衰託沙堤  
於槐蔭荐桂苑之香苔襲青青乎楊柳遠黯黯之塵埃  
萌芽毓而三秀池塘夢以多才碧烟消兮春光自去紫  
芝萎兮仙人不來隨蘭衣着綠傍菊帶垂黃庭階承雨  
露原隰奈風霜顏色忽憔悴時光見燠涼崑山有玉圃  
瑤草四時芳溪毛與澗芷可以羞君子任重藉白茅微  
材貴夙屯

霜來悲落桐

悲落桐桐落每霜前一片投金井秋聲起玳筵秋聲最  
可悲逐臣棄婦知布穀催華晚寒蟬抱葉遲涼飈吹病

蒂明月漏疎枝根下清砧響槎間幽鳥啼據梧同萎卸  
棲鳳亦化離堦下濃陰散琴中前調亂材木竟凋殘知  
音終汗漫徒龍門倚阿閣拂青雲發翠萼胡百尺之亭  
亭乃三秋而落落豈直幹以早摧抑美蔭之難託閒庭  
墜細雨短壁舞飄風客來三徑滿烏匝一林空影瘦同  
人老中虛與道通後凋輸翠栢炫色陋丹楓疎落存高  
致蕭涼信直躬雲棲無鬣鬣鶴夢失菁葱碧梧枝黃菊  
朶此蕭條彼瓊娜視開謝爲盛衰亦人心之偏跛或制  
瑟以登歌或傳薪而爨火顧此青桐枝飄搖甘遜時朱  
絃疎越者同作廟中犧

夕行聞夜鶴



聞夜鶴夜鶴月明中薄遊澤國外未返溟滄東顧月明  
與星稀更河澹而雲微動悲涼之高唳感離索以孤飛  
邈碧落與蒼梧恨遐舉兮心違乃勞勞於曉暮抱素質  
而誰依展修翎振高羽冒霜露淒風雨亂白雲之皓皓  
負青天而栩栩曾邀南極翁來會東王公蓬萊水清淺  
浩蕩逐天風徒驚仙路渺忽墜紫霄空偕雁爲行役輪  
鷗泛朝夕人間不可容仙藉已見謫駕烏鵲竊兔藥泛  
星槎酌斗杓冲萬仞之烟光矚千年之城郭得逍遙以  
成遊更培風於不弱贈丁令以紵縞娉麻姑之綽約悠  
悠任余之皚皚涅不緇名山藏自足蹈海無還期先德  
朝陽鳳時趨攫肉鳴不作雉雊誰憐鴻漸儀招我三

峯小辭人九萬低滄桑供飲啄知命復奚疑

晨征聽曉鴻

聽曉鴻曉鴻苦遠征勁翮凌霜露孤踪轉塞城迢迢來  
漠北兀兀到江南哀音帶絕域寒影落澄潭梁稻求難  
飽兼葭久是耽群飛誰樂造高唱獨愁含江渚連冰雪  
衡峯隔翠嵐網羅多叵測山水遠何諳陟沙磧涉瀟湘  
不得意姑隨陽感朔南之易陸悵寒燠而靡常心勞勞  
以避地迹歷歷而殊方長雲經險棧寒雨迷空澗幾畚  
飛李新移時梅菊綻飄搖非繫舟流落如遷宦臺閣慚  
鷓鸞粉榆啗鷺鷥伊人刀俎危之子風塵慣慨日月之  
弗與嗟生命之有涯望雪山兮瘴海信樂土而非遐降



李陵於朔漠老賈誼於長沙亦逝水而不返奚惆悵乎  
無家來唱秦時天馬歌往奏虞兮南國此鴻去鴻來楚  
漢盡春秋人世本無多徒書天板字不寄錦文羅縱具  
封侯骨封侯奈老何

解佩去朝市

去朝市朝市厚淄塵二疏高辭漢三良傷殞秦簪紳莽  
鸞鳳愧荆榛領郡蟬蛸夢登塲傀儡人乘軒輪鶴  
貴解帶謝兒嗔豈飛舄於仙遊匪掛冠於禘武省紅朽  
之五斗免鼓吹於一部棄芻狗效雄鷄消悻悻息極極  
謝平津之招致去江夏而分睽悔四皓兮輕出羨二士  
兮終稽齊館吹竽散天爽滿都觀捧檄因親喜失祿動

士嘆何險可擬走匿約堪納牖隱矣本無文去兮焉恤  
筍絃驚羽翼傷鏡破減容光何日歸鸚鵡終年閉上陽  
九歎空相馬三黜竟羸羊砍桂誰畱蔭芟蘭別有香舟  
車覆牛馬走熊羆號豺虎吼隨曲伸為龍蛇胡跼踖於  
高厚唯彼魚與鳶誰道異天淵曰馬奚云白無門不是  
玄吾生有命在偶然非偶然

被褐守山東

守山東山東古霸國鄒魯絃誦聲邯鄲佳麗色美醞釀  
中山名馬來代北悲歌見慨慷肝膽羞傾側荆聶侶毛  
薛徒燕禮士趙託孤丈夫五步頸血公子三千履珠壯  
干城之頗牧鄙唇舌之張蘇歡博塞戲樗蒲負寶劍擁



嬌姝毓山川之坦直得意氣於豪麤宜小人之學稼胡  
君子而為儒為儒喜棄繻拜闕屢剖符作吏非清要辭  
尊讓美腴墓廬輕委置簿領強支吾冉冉辭鄉縣悠悠  
閱播遷浮沉驚陸海歲月悞華顛江上何書記樓頭王  
仲宣歸歟艱卜日老矣惜殘年生我懸弧矢乘時飾勒  
鵜單親難得養百口尚何牽仗劍出門去平羗逐伍旋  
尚書郎不用湯沐邑為田信陵君湯沐邑在  
栢鄉北二十里伏臘酬牲  
醴桑麻省陌阡白雲南隴墓春酒北堂慈卒歲常溫飽  
全家遠市塵輕裘細葛盡短褐亦褊褊還檢投餘筆栽  
詩寫碧天

九歌 並序

詩之後有騷朱子謂前有讒而不見後有賊而不  
知寧獨春秋乎哉則騷乃繼聖人絕筆而有作也  
余困頓中成九歌以抒懷

解佩

火雲起兮蔽空滄溟涸兮炎風焦土焚林兮如燬赤日  
離空兮方中客勞勞於江海兮思豐草與長林乃維舟  
而稅駕兮接洲渚於城闈崑峯之古玉兮莫求吳苑之  
佳麗兮曾遊好鳥知止兮集菀野鶴言歸兮山陬暑氣  
蒸而羣探湯兮何獨和孺子咏歌也雲漢高而爭干澤  
兮何不隨巫覡以婆娑也競執熱乃乘時兮遂披襟以  
避燠衆舞雩以祝釐兮竟誓天之無惡信恢恢而渾穆



穆兮宜容容而隨碌碌亦迂路於康莊兮致險成於跬  
步黃塵黯兮汗揮甘井渴兮泉微夜聚蚊兮殷雷晝驅  
蠅兮紛飛一枕橫兮星側孤懷抗兮天仄露湛湛兮斗  
傾漏津津兮窻黑朝霞散兮曙光起烏鵲繞兮鯤鵬稽  
芳草蕪兮夢結清湖濶兮烟迷浩浩長空輾義輪兮軼  
於九方曲曲污池涸修鱗兮阻於三江惜長晝而瞻日  
兮欲獻曝而無媒恥衰年而失意兮扳天聽而不回章  
甫卸而服襪襖兮愚不辨夫菽麥車馬擯而牧牛羊兮  
衰不勤於阡陌頽魚搖尾而惜勞兮閒鷗斂翼於洲磯  
歸雲侮風而蹉躑兮青山逐棹而依違慨命途之偃蹇  
兮如晦夜而陰雨羗朝陽之盛烈兮望容光於涼踞愛  
夏景之舒遲兮或滴血於泥塗障罽塵以惆悵兮來秋  
風而病蘇亂曰玉質兮金相往來契闊兮流光  
解佩雲水無際兮相羊

幽居

泰伯高城之崔嵬兮春申苗裔兮久寂寞讓無名而德  
建兮竊得戾而難作業素盛而可卸兮功不成亦當退  
栖於棘而絮敗困於石而玉碎彼重關之矢然兮不能  
園夢以來往雖陋室之容膝兮未嘗息神於惚恍兩窻  
黯黯而昏晝兮帷燈閃閃而催漏蝸涎綠而蛛網張兮  
為惡聲而鼠狂闔門前之客幾人兮甌內之儲幾塵兮  
天際皓皓未滿一輪兮流光駸駸動逾十旬兮過元亭



今空其谷買豬肝兮梏其腹簡書畏兮逐臣剥啄煩兮  
醉尉叩閹閱之如天兮訴謁者兮如鬼弧張車載入九  
疑兮狐假虎負而來衆誹余何有堅甲利兵破此愁城  
耶客何來高談雄辨通我困情耶雲隊隊而築圍兮水  
涓涓而繞郭雨淙淙而鳴鏑兮烟靄靄而垂幕日夕求  
古爲徒兮希榮而或得辱徵逐干時之潤兮歡未結而  
怒觸月多情而窺牖兮雀知曉而噪簷風拂壁以動瑟  
兮苔作色以侵簾惟仁可安舍弗居兮習坎有窞而被  
擠惟米可負贖致嘆兮捧檄有喜乃失計夜弗寤兮朝  
弗醒未食飽兮食復飢無言督悶兮言則煩對客感慨  
兮吟詩悲稚子夜啼兮老親晝卧妻妾辛勤兮井臼操

作廐無馬兮出無輿奴忽驕兮婢益情亂曰高城望迢  
遙兮幽居鎮日寂寥兮失所居而爲旅憶占鳥焚其巢  
兮

忘憂

萱之生兮帝都王者之香兮異馥萱之榮兮瑤闕仙人  
之佩兮蘭簇花秉金精葉翠羽兮冰雪凝素兮托松栢  
蔭小草兮霜風惜披離兮蕭索鳳髓麟脯兮昔登筵澗  
芷溪毛兮今勸餐錦屏綉帳兮承暄苦雨淒風兮怯寒  
板輿迎而華旌導兮文榻陳而彩燈照兮集下女以奉  
色笑兮進甘脆而旨酒飭兮胡晴霾之叵測兮知孤根  
而獲戾也甘卉木之歇芳兮傷宜男亦值曠也襲猶以



代薰兮固萋鮮而葵晦摧桂以積薪兮亦蓬潔而莖穢  
金屋玉堂滋蔓草兮挹清宵之露灑孤館閒堦寄三秀  
兮邀中天之月光仰慈顏之隱惻兮欲殞生而身子痛  
莊子之淪落兮强支持而憂切思慰懷而無方兮菽水  
何以承歡處險阻而多慮兮食寢何以得安涉風濤於  
江上兮冒炎歊於吳門執兒手兮默默意鬱鬱而無言  
守清齋而面癯兮典衣衫而裘敝念游子而遠來兮值  
憂患而不忍去訴情愍於昊天兮雲疊疊而騰高寄涕  
淚於滄海兮流浩浩而驚濤昧止足之分義兮顧田舍  
而蕭騷求祿養而忘艱虞兮負母氏之鞠勞脫簪珥以  
充糗糧兮分果餅以恤幼惜兒老而忘年兮痛兒瘠而  
不可恃母能育子兮子不能事我生兮何益

荷薪

恒維高而鎮奠兮挺千尋之良木撐天柱於紫極兮護  
雲氣之清淑爽花開謝於空山兮滋僊液於洞天鼎鍊  
薦馨於清廟兮進梅子於几筵培喬林於十世兮蔭大  
茂之美質分棠棣之敷榮兮各成章而結實朝一枝之  
栖托兮遽菁華之卸歛嘆樗櫟之依社兮名散木亦何  
忝大匠顧而眷念兮樵人覘其斧柯不當門而竟芟兮  
凋秀色於巖阿愧廊廟之梁棟兮亦幹材之可器用也



值剪伐而棄捐兮究荆棘匪可種也  
放松柏之耐寒兮久霜雪之弗避  
終雨露之致潤兮聳風雷而蒼翠  
藉春色而增妍兮羞堯李之披紛  
曝秋陽而抱朴兮呈直節於高旻  
蟻登槐而寄夢兮與蝶羸爭聚也  
蟬吟梧而致潔兮爲風露懷懼也  
聞丁丁於巖谷兮逞斧斤而適當  
嗣濯濯於嶺澗兮作樸棧而逢傷  
植選樹於園圃兮噪衆禽而爭巧  
棄大木於郊原兮廢一概而失較  
日月並臨照兮林薄蔽焉幽谷  
萍梗遠漂搖兮沙塵埋其芳躅  
嬾嬾之心思托薦蘿兮搖搖之根  
蒂結差莪兮山鬼悔而工挪揄  
兮霧豹隱而遠虞羅兮嶺際之  
白雲兮常自卷舒洞中之仙籙  
兮試叶居諸亂曰質亡兮郢南  
伐桂

兮剛斧爨下焦而溝中委兮誰識勞薪之味苦

登樓

久索居兮寡營遂登樓兮遠顧  
悵高城兮望斷惟遙峯之聳露  
彼江岸之迢遞兮繞綠樹以含  
烟隔關山已無數兮勞魂夢之  
回旋欲依劉而無計兮思吟越  
而何堪荒墓田而拱墓木兮履  
霜露而生慚載仕贄以辭家兮  
隨鴻翼而弗息值衰齒而解組  
兮繫匏瓜而不食收嶺雲與江  
月兮固耳目之清供携藥裹與  
詩囊兮疑蕙苒之累重測測乎  
天地原小也馬往而能容疎慢  
悠悠乎運會偶然也雖聖人而  
不免憂患擴襟懷於香海兮任  
波臣之震蕩齊大化於洪爐兮  
憑二氣以消長古逐臣



比棄婦兮惟知命則心安縱憂讒而畏譏兮必樂道而  
域寬心搖搖而念遠兮望長安於日下葭蒼蒼而凝睇  
兮思伊人於水滸碧宇之覆物無際兮欲長往而有垠  
黃土之歸骨靡多兮足大塊以微塵倚危欄而邀雲朶  
兮攀仙人以樓居顧明月而挹風聲兮招天籟以入窻  
虛舉濁醪以酬影兮尔汝固無間然讀離騷而證時兮  
嫵直終鮮瓦全百尺之上置身兮今何不鵬飛九萬也  
千仞之堅築防兮豈免基穿一颺也俯矚吳城寥濶兮  
何處結要離之豪憑弔閭亭歷落兮至今稱傭作之高  
亂曰十年江海兮雙鬢雪層樓偃仰兮一身子四繞雲  
峯兮天窄一上九迴兮腸結

秋雲

望秋雲之蕩天脊兮任飄忽而徙倚歷古今而靡定致  
兮逞浮薄以漫瀰蔽日月之升恒兮空黯澹以成陰作  
霖雨而散亂兮慰雲霓而疚心橫青山而阻目兮斷羈  
思如羅網過澄潭而垂影兮淪清鑑於虛朗來茫茫而  
布蔭兮儼萬間之堂榭去隱隱而泯跡兮失膚寸之憑  
藉交天衢而易渝兮忽零落於水滸出巖岫而忘返兮  
胡栖遲於簷下神龍知弗託兮以輕佻不任載也仙子  
棄弗乘兮以變遷多異態也旣紛紜於帝闕兮假霞光  
以旖旎復雜遝於河漢兮效烏鵲之迤邐曷汝德之薄  
而位亢高兮何汝意之游而忍屯膏兮罡風將及遂如



卷一  
卷一  
捲濤兮明月常好而遽張幃兮欲結納於林麓兮織烟  
霧而生寒將顧盼於廟堂兮虛丰采之殊觀豈有意於  
蔽空兮希湛露而節珥抑作巧以欺世兮阻健翮而心  
喜起無端而忽墜兮升沉固非汝料聚偶然而倏散兮  
金石固非汝肖知久要之難信兮不謂旦暮有榮槁知  
生死之多故兮甘食盟言而潦倒燕雀親而鴻鵠遠兮  
已比匪而違卜秣吾馬以淬吾劍兮投荒遠為驅逐亂  
曰麗天兮如鱗密復踈兮雨浥塵見青天而觀白日兮  
須披決於八垠

調飢

鄙謀食之皇皇兮學干祿而栖栖成觸藩之羝羊兮輸  
斷尾之雄鷄古者為貧而仕兮今乃已仕而貧胡不蚤  
為躬耕兮勞力而無求食於人咏北門之貧窶兮服官  
而尚謫家室羨東山之聲伎兮謝政而胡多狎暱陶羞  
五斗而賦歸兮思辭九百於為宰嗟冒冒干微祿以承  
歡兮竟遑遑然不逮在唐宋之禮使兮存祠祿以養老  
矧卿相之少年兮致富貴之身早彼殷周之繼世兮食  
邑閱數十代雖世卿之著譏兮亦忠厚之可愛乃朱門  
而忽白屋兮以簪胄而竟徒隸朝鼎烹而暮乞食兮寧  
澤斬於後裔惟晉公之樹德兮直紋入而口不緘傷亞  
夫之相法兮通侯封而餓以殲胥游吳而吹簫兮愁毒  
甚而思殉也聖在陳而絕糧兮上下離而致疹也余固



平易而無畜怨兮余常慷慨而樂施無胥之豪而有其  
厄兮無聖之德而數則奇採秋菊之落英兮固香潔而  
難果腹待翠竹之結實兮信清脆而堪辟穀儉成廉而  
常飭兮奚致朝夕乏饘粥飢可樂亦自慰兮奚能擎拳  
兮無梁肉傷老驥之遇困兮伏短櫪而思無窮哀王孫  
之鮮資兮負長劍而爲誰雄非細腰之是好兮少婦頓  
損乎丹顏惟苦吟之是耽兮故友相嘲於飯山亂曰爲  
卿而憂貧兮可賀大任將降兮體腹餓余求贍八口而  
無計兮金石歌聲能無作

放言

維客懷之侘傺兮乃寄意於放言效長沙之逐客兮吊

汨羅之忠魂信豪吟之歷歲兮無一字之堪衰古窮愁  
而著書兮棄相印爲行旅慨文帝之好老兮未嘗備黑  
衣之職傷平原之不知兮固曾覩黃裳之色覽北固之  
江山兮負緇屐於周行值澤國之風濤兮傾一盞而騎  
張素夏畦之爲病兮非余敢長傲也遵非鬼而不祭兮  
嫌余不善媚竈也宇宙甚大無悅已兮奚自爲客風月  
甚佳貴造意兮吾好是從願浮槎於星漢兮滄海一粟  
而不足蹈欲御風於天衢兮帝闈尺五而不能告龍之  
逆鱗可披兮蜂蠆之毒忽螫虎之長尾可履兮魑魅之  
技遭格效扣角而牛喪於易兮羞鷄尸而甘後欲補牢  
而羊亡於岐兮雖讀書亦大謬嗟麟檀之堂皇兮如鳳



毛零落可掬也陋免窟之經營兮惟鴻爪雪泥弗盛也  
九天之高懸日月兮代明而曷有蝕晦九淵之深藏蛟  
龍兮蟠沙而自憐墜墜迎春色而送秋光兮萬古共此  
時令駕高車而行蓬藜兮生民各賦數命靈之爲靈久  
定兮身後美名一杯酒儒之爲儒性成兮夢裡悟言一  
回首欲辨同異於公孫兮仰觀於天而突兀欲問通塞  
於君平兮安隨乎化而木訥亂曰身將隱矣何文論降  
志辱身兮斯放言鷄鳴狗偷兮集戾門士之不遇兮道  
固存

北征

胥江迢迢兮龍山隱隱扁舟容與兮孤懷鬱蘊紛雪落

而冰堅兮復冬殘而春近憶薰風於五兩兮送南浦而  
人遠凜寒途於二日兮聞朔雁而歲晚歷歷驛路兮記  
舊遊蕭蕭妻子兮共清愁布帆遲遲兮涉江海漁歌款  
款兮起汀洲過毘陵而慕讓賢兮越朱方而消壯志隔  
烟水兮夢揚州顧山川兮辭吳市彼子美之來吳兮隱  
滄浪而寄直亮惟子山之懷鄉兮素瀟灑而忽悽愴雖  
千金而不烹吾帚也雖斗珠而勿發吾筍也囊燕石而  
不易瓊玖也守故婦而不忘井臼也習北方之家學兮  
念手澤之慇懃謝南國之華文兮羞時粧之炫新思西  
岐之美人兮憶前王之賢親近東魯之聖域兮筮神箸  
而問津嗟老至於冉冉兮求安身於環堵奈事變而蹉



陀兮悔榮心於華組霏清言於玉屑兮寄閒情於揮塵  
携樽酒於碧岑兮縱游踪而陟岵悉曠達之樂致兮憂  
鍛羽而莫飛困英雄於暮年兮志千里而願違望莖嶺  
之春芳兮守仙洞之雲微凌南湖之秋波兮採芙蓉而  
露晞有書可讀兮胡封塵有田可耕兮胡茂草先人敝  
廬兮賣不贖南原墓隴兮荒誰掃去鄉縣兮二十年家  
計消兮留祭田歲時伏臘兮陳豆邊春酒北堂兮奉壽  
筵歌曰憶歸兮歸已晚思之邇兮室則遠試長言以寫  
愁兮情未盡乎繾綣

周公之爰也莊周感之而作南華譚大夫之詩也屈  
原感之而作離騷志之所在不必其同也不必其同

所以無弗同也得此意可以讀擬古擬騷諸作矣

後學

沈德潛識



懷舫詩別集卷之二

鏡咏

余性愛鏡取其明能自照也偶於病中一覽慚鄰  
土木思得排遣卽托以寄興焉蓋惟明則不惑故  
可樂以忘憂其中爲鏡者十之一二非鏡而爲鏡  
者十之八九要在寓物言志當求之於形骸之外  
矣

墨晶鏡

墨光宕漾照蘭膏枯蠹乾螢笑久塵宇晰蠅頭誇老健  
眼騰牛背讓時髦排空似覺開雲霧掩卷方知剩粕糟  
焉得明珠懸不夜百城傾倒見秋毫



千里鏡

寸管窺時盡大荒樓居術擅費長房平臨江檻疑搽楫  
一望峰屏悵面墻沙鳥草蟲來曲几腮脂眉翠出深堂  
舉頭十里雲中寺堪對閒僧話上方

顯微鏡

芥子須彌眨眼間案頭聚米壘丘山蠅癡斫脛因觀髓  
虱蠹吹毛更索斑曾於鏡中見虱滿背長毛光照戰場蚊控蟻古今注云  
魯有人見河邊人馬無數火照之人蚊馬螳也界分敵國觸侵蠻莩舟細讀東  
坡賦柳骨顏筋筆致閒閩人能刻莩核舟載赤壁賦百餘字非此鏡視之不知

多目鏡

淨宇何須着點塵纔容一物便訛真分開方正廉隅界

化作百千萬億身麥秀多岐紛獻瑞花開無數總藏春  
隻錢囊底方羞澁持照能令頓失貧

火鏡

能向日取火

燧人就日日宜中空處生明得感通直輾圓輪連赤道  
長伸浩氣豁丹衷葵心一片盈腔熱寒谷崇時萬灶紅  
不繼殘膏鑽朽木輕煙早散漢家宮

水鏡

能向月取水

鏡月人間喜共圓水晶宮殿廣寒邊眼前銀海波傾瀉  
掌上金盤露滴涓藥液偷來勞羿后桂槩斫得倩剛仙  
願隨玉漏清霄滿賦奏明光獻醴泉

電鏡



寒光凜凜掣雲窩照胆誅魂心自姿俗謂電為母城府秘高  
搜惡隱襟裾深護辨形訛天威已懾寬雷鼓神目難逃  
代筆戈願借片輪懸暗室終身衾影保蹉跎

### 碑鏡

豐碑燭鐸似藜青蒼石千年拜典型雨洗風磨無垢體  
月麗日曝有英靈龍螭火發開昏霧蚪蚪精搖綴曉星  
不聞幽潛徒誦墓寧留無字照空庭

### 錢鏡

寶花嵌背古銘鑄殊翠斑成秦漢前半掌掩如食既月  
五銖持似鑄完錢櫻莢不比唇脂約椽筆難添眉黛妍  
最好寒光藏帳底夢回常見曙星懸

### 盆鏡

常飢季女照啼痕酒盡床頭有瓦盆汲井泉寒織腕冷  
握雲髻褊闔窻昏芙蓉面灑宜秋水水雪膚清本素門  
粧罷臨池中自浣魚沉原少粉脂吞

### 磚鏡

傳燈錄載讓禪師一日在馬祖庵前磨磚祖問何為答曰欲得成鏡

斷巖殘甃浸山泉歲月消磨不問年泥滓澄時存性古  
垢塵離後發光堅一空自悟虛能照歷久方知白是玄  
面鉢原忘磚鏡相於今撒手更無磚

### 僊鏡

述異記載海外日林國有石鏡方數百里照見臟腑可以療疾名仙人鏡

傳聞海外隕星精碾鐸千尋肺腑傾二豎膏肓除諱疾  
重門洞達見開誠誰為孤孽呈君父雅託金蘭向友生



願俟蓬萊清淺日鑿山建柱殿前楹

天鏡

梁簡文帝奉阿育寺錢故云懸天鏡於域中謂天光也薛道衡老氏碑亦云光垂天鏡

抗懷玉宇仰高華俯照森羅萬象奢磨蕩生明惟日月  
掃除難盡有雲霞臺前駕鵲虹橋潤屏裡翔鸞雁陣斜  
人物河山無際景看來恁是鏡中花

湖鏡

太白詩開帆入天鏡蓋謂湖光也宋范成大詩棹入濕銀天鏡中元薩都刺詩西湖天鏡碧隨地俱此意然愚以為不如直名之曰湖鏡

澄湖霜湛靜涵空搖動星河沉綠中  
荇藻沾衣新柳染芙蓉浴面曉霞烘  
鶴翔月影歸瑤闕魚泳荷香入碧叢  
人在瑠璃光界住珊珊骨響玉玲瓏

業鏡

俗言森羅殿上有鏡能見其人生前諸惡眾善形像

夷跖同歸世共疑冥途誰道少南離  
業存盡見空為色棺蓋方明是與非  
耿耿燃燈照無漏恢恢鑿影得多師  
移懸心上常回照陽虎何難做仲尼

金鏡

唐相張九齡曾上古今金鑑錄

古今一鑑越千秋製自皇農歲月悠  
揖讓征誅窺舊跡怠荒兢業警前修  
禹功殷鑒興亡樣往轍來規傳遞郵  
豈止帝王宜仰面儒生長夕寓雙眸

屏鏡

有以鏡為圍屏及插屏者

屏山幾曲錦堂寒倚遍巫峰見舞鸞  
獨立佳人釵十二無雙國士劍闌干  
樽壘進客加酬酢面背相君盡委端  
移近南榮邀晝景渾疑堯日出團團



海鏡

海濱有蚌小蟹藏於蚌腹饑則出而覓食食畢入蚌蚌以蟹為饑飽在漳親見名曰海鏡

蠢類相依饑溺同知為倫物著和風草蟲近見無殊體

四川有藥其葉夏為草其根冬為虫名曰冬虫夏草烏鼠何疑共一宮蟹識攷形

明納甲蚌能藏垢守黃中曠觀胞與皆同氣對此應為

一撫躬

心鏡

莊謂環中應莫窮須知無定乃為中物來有跡心方照

物去無形衷自空禪說宗傳生即性儒云天命理相通

誠存鏡體明推用祛欲敦仁作聖功

月鏡

舉酒邀來欲問難人間同照異悲歡關山笛裡含顰望

歌舞樓頭帶醉看圓缺君恩分向背陰晴天意亦暄寒

一生幾得當頭好又見西巖墮似盤

玻璃鏡

來自西域原為玉屬近皆燒成非木質矣真者難得一各頗黎

天馬隨來價久騰光欺玉鏡掩珠燈羊脂琢作雲千片

蟬翼堆成雪幾層秋水當眸開曉匣霜潭照面怯春冰

炎天素壁懸亭午枕簟清寒有凍蠅

火齊鏡

拾遺記渠胥國有火齊鏡能於闇中照物且能隨聲苔響

月盡珠來繼日餘仍留寶鏡顯幽居闇窓描黛分深淺

獨夜吟騷聞嘆噓光照清宵愁耿耿聲傳空谷響徐徐

更長燈燼閒相對似與僊人話碧虛

蝕鏡



美人黃土古驚心歲久光殘夜壑陰一閉香奩埋鈿玉  
重隨金椀出幽沉曾開笑靨添螺黛記照新粧盞寶簪  
剥落到今誰復顧鍾情相對感亡琴

圓鏡 即陳樂昌公主事

往事徒傷奪馬悲金甌竟與玉同虧楚歌愁聽騅無逝  
秦鳳驚飛簫尚吹照月華燈新艷曲還珠海浦舊羅帷  
不如宵井甘隨死破鏡留刊節婦碑

懷舫詩別集卷之三

閩漳竹枝詞 有小引

蠻烟瘴雨邁萬里以賦孤征斷髮文身撫十城而為  
長吏琴焦鶴瘦不值祖榮一錢服異音殊難署陽城  
上考齊王門前鼓瑟怒客不吹竽坡公海上為文強  
人妄說鬼草木鳥獸名多識於詩云月露風花技無  
同乎作者非堅白同異之辨寧如鄒衍談天記山川  
景物之奇何異齊諧誌怪雖無三異政猶有百蠻詩  
榕樹婆娑一畝陰霜皮古幹歲年深風吹四季皆秋響  
路左停驂感客心  
傍水依山烟火稠百家共住一圓樓郵亭到處僧茶供



且息勞肩下竹兜

健飯輿夫趕趁忙糕糜隨路塞空腸日間辛苦夜間賭

落得連肩滿背瘡

誰家高塚靠山旁華表豐碑短石墻舊壙潛開新骨換

教人何處認耶娘

高阜平陵怪石攢團團臃腫不中看晚來返照前林黯

烟雨迷離黑似磐

額頭廢壘列杉松落照荒烟靖遠烽客過關前思往事

但聞山寺一聲鐘

頭尖腹闊海船形浩蕩風濤一葉萍天水瀾漫何處認

日觀島嶼夜觀星

千峰萬壑匯羣流水急灘深亂石稠激浪成雷開棹下

浮生到此悟虛舟

村頭羅列糞坑多覆瓦垣墻養種禾偏向厠邊開飯店

厨名香積果無訛

屋頭瓦似赤城霞窓小簷低竹樹遮富室更誇高脊好

要塗金粉映丹砂

筍輿來往嘆栖栖利鎖名韉東復西瘴雨蠻烟催客老

傷心那聽鷓鴣啼

高處開園阡陌連蔬畦麥隴雜栽烟水牛不及黃牛力

草梁支亭飯厝邊閩呼屋為厝

市頭海物列奇形容過腥風夾路生禹鼎鑄來多缺略



更須山海補遺經

言語殊方各未通閩中從宦耳全聾他年詩稿重刪改  
獨有禽言更易工

聽訟從來易憚煩更難爽捷是傳言抑揚緩急憑奸吏  
焉得民無盆下冤

名姓難稽應考童一人數卷半雷同不圖院試圖他售  
文字荒疎取利工

小小歌臺僅丈方咚咚鼓響日金粧大郎旗上龍開爪

賀客稱觴唱土腔

俗呼人為即春元為大郎  
豎旗雕龍繞桿四爪開張

石坊高建勢巍巍官顯能增里黨輝富貴却來欺父老  
鄉人愁殺錦衣歸

戶外家家挂竹牌門前白石砌成街風來難揭湘簾起  
何處春遊暢旅懷

五彩屏高黑漆光官衙處處坐汾陽額南宦遠難攜去  
流落人家夾板墻

織成倭緞閃金花綿軟平絨厚更佳六月炎風絺綌少  
著名海內有漳紗

水晶五色號奇珍雕刻精工價百緡獨有墨晶光似玉  
檢書偏愛老年人

壽山石價玉爭高名手鐫成誇寶刃近日芙蓉多賤售  
送人珍重豈鷲毛

飲啜從來口獨專近年鼻內可吞烟珊瑚玉石雕壺巧



珠寶鑲成價百千

日中多少趕墟人只識番錢不識銀閩地有山無寶藏  
財源浩蕩是波臣

水沉香蕪小洋爐洋造盤盂工緻殊洋畫美人標格好  
雙眸如漆髮如硃

也養蠶桑也樹麻也栽藍草種紅花囊收芋栗非為貴  
一日三餐有地瓜

倭鐵為刀霜雪凝洋油澆蠟與風爭布名火浣裁衣好  
不怕劉家婢覆爨

蘇木胡椒未足奇玻璃琥珀品仍低珊瑚成樹真珍寶  
棗大東珠帽頂宜

年年文旦進漳南長至開園剪貢柑百擔千夫馱載去  
紅塵一騎古侈談

四角琉璃碧玉瓶紅毛美酒價非輕雞缸斟出丹砂色  
攻破愁城仗此兵

嗶吱緞子羽毛紗哆囉呢來哈喇吧夾板舡高泊鷺島  
到時先買武彞茶哈喇吧一○囉番音落喇番音辣

鄭宅茶名達五都旋烹細品說工夫客來難解相如渴  
可得盧仝七碗無閩中品茶壺蓋甚小名為工夫茶

會聞奇巧戒羣工近得張騫西域通不用雞人傳曉箭  
袖中買得白鳴鐘

龍蠶蠕蠕列酒肴欲窮口腹廣厨庖嗜痂有癖誰能解



對爾忘餐如繫匏

江瑤柱炙口流涎舌吐西施脆復鮮滿市螭螬多賤賣  
饒夫下箸省金錢

仁栽文旦剪同時紅白釀分對酒卮寒夜供盤邀客醉  
珊瑚色映水晶奇

海南異味有栳榔椰茗堆盤敬意將滿口嚼來如血塊  
櫻唇吐送代茶湯

貧人夜市逐羶蠅擔上高挑小竹燈腐腦湯圓皆軟賣  
米團包蜜拌糖蒸

草中結實號王梨皮皺如鱗味勝飴額外尋常佳菓少  
甘寒却與酒腸宜

紫袍碧蒂玉凝脂五月街頭賣荔枝多食盡言能却老  
小人有母遠難貽

烏瓶貯水瓦溝渠夏月人家養鬪魚何事爭端及細物  
魚麗名陣果非虛

四季瓶園供艷葩冬來桂菊間山茶老梅窓外猶堪賞  
綠葉成陰滿樹花

帶葉梅花  
天下無

佛手離離窓外垂小山石盎映疎枝溜塵黯淡多岐路  
應借瞿曇一指迷

栳柳歲老樹留雲丹實低垂映落曛扶杖長林驚五色  
碧梧烏柏許爲羣

香柑香潔摘秋林入貢 天廷廟薦歆大內宣窰盤似



玉鳥皮几上供黃金

洋菴五葉性甘寒別種番榴肉可餐朱橘味酸多作餅  
明薑糖伴佐辛盤

荔葉冬青似栢松疎枝古幹矯如龍福元肉厚煎膏好  
點茗馨香入酒濃

紫竹扶疎籬砌東最宜細雨與微風月明栖穩雙元鶴  
常有慈雲覆密叢

幽蘭似草每當門修竹如蓬更長孫漫道清貧無宦趣  
佩蘭食笋是君恩

芭蕉展葉如舟大棕樹生鬚比帶長窗外嬌姝丰態好  
斜飄翠袖露紅粧

蕉有美人名丹心碧葉

婆羅蜜種樹亭亭結實居然類海萍漫說葡萄來絕域  
雕題鑿齒慕威靈

竹間有鼠號和蝮肉嫩脂肥動鼓唇也入庖厨充異饌  
豈惟象齒可焚身

地龍入藥亦充庖細切微烹列饌肴墻下有聲如怨訴  
浮生何處避訾訾

蔗根有物細蜂腰食蔗名蠶八足趨腹內甜漿招口禍  
身投鼎爨入烹調

畫眉巧舌奏如簧錯認樊籠作戰場海闊天空飛不去  
却爭梁稻羽毛傷

鷦鷯之外更闢畫眉

杜宇枝頭急喚歸能言鸚鵡賜緋衣九臯時有和鳴鶴



雲外曾無一雁飛閩有紅鸚鵡鴻雁不至

臺灣麋鹿性純陽舡載筋皮販四方胎臙血茸求更慘

戕生速死樂閨房

山高額峻逕崎嶇有虎潛來伏路衢勞吏三更燃火過

拚將微命將尊鬚

額外山多平地少秋高雉兔竟寥寥會當縱轡郊原濶

風勁弦鳴鷹隼驕

三冬歷盡不圍爐往往花間細雨濡竹榻擁衾覺夜冷

曉來瓦上薄霜鋪

冰雪從無到眼看蚊聲夜斂覺輕寒浪遊萬里殊方客

帶得星星髮裏攢

歲朝蒸得米糕黏拌用沙糖和蜜煎何事辛盤全不設

世人盡愛口頭甜

元宵鼓吹市喧騰蝦蟳魚龍盡作燈神廟釀錢煙火盛

鰲山處處看峻嶒

祭非其鬼盡淫祠名姓離奇事莫稽更怪忘言天保廟

狄公若到定焚之

瞿曇談日寺僧忙檀越家家親送湯名是佛茶非苦茗

茴香香水攪紅糖

貂紫銀青時樣衣黃羅張蓋緞輿幃舍神路遇分官爵

傀儡逢場底是非

腰鼓橫拖唱稻歌也來額外舞婆娑詩言游女惟江漢



似尔風行遠更多

年年迎會喜新春旗鼓刀鎗共賽神一擺一搖知甚意

渾如潦倒宰官身

土人迎神俗例行必搖動其年豐收

生男弱冠走諸番日本琉球生意繁垂白年年疑淚眼

倚門望斷老親魂

讀書讀律學呈詞刀筆精通作訟師未害他人先害己

獄門常見爾輿尸

海洋風起浪稽天海上漁人競放舡名是漁翁實是盜

殺人沉水捕魚還

山高嶺峻路蠶叢竹樹蒙茸亂似蓬險處綠林常肅聚

並無苛政更年豐

海濱大姓幾千丁恃衆憑陵藐憲刑更有逋逃 上策

土樓高聳戶堅扃

海上功名舊易成誰爲捷徑惜繁纓由來引得人思亂

常想潢池盜弄兵

功加將備死亡多買頂何嘗親荷戈按冊稽年皆八十

安來如許老廉頗

火榕惡樹拂生瘡草葉吞喉解斷腸瘴氣所鍾生毒物

安能枯委類祥桑

海濱拐棍最無良婦女兒童販外洋禦暴翻成爲暴客

扁舟穩載賣番邦

海口山頭鎮石城當年割據起戈兵太平盡化侯王貴



袁楮憑誰問死生

文公遺治已千秋閨閣風規教化留貧婦鶉衣行陌上  
人人三尺布滕頭

貧兒糊口仗雙肩竹笠麻衣襟肘穿脚底皮如鞋底厚  
踏來砂石軟如綿

赤脚綿裘布裹頭登山緣木似猿猴禽言獸性違王化  
刮貧傷人上土樓

生男十二髮肩垂賣作豪家紅雪兒婉轉歌音渾不解  
周郎座上竟如癡

興化女兒顏色好雙眉留待鍾情掃多少飄零嶺外人  
懷春欲向柔鄉老

古道通津建石橋長虹高跨玉龍驕洛陽遺愛留千載

靈爽碑文鎮火妖

元妙觀中井冽寒官衙每汲供盤餐心脾慣浸清泉水

欲贈長安鞞客難

漳城內井泉觀中第一

由來花底活秦宮嶺表居然煽此風斷袖恩深成按劍

棄家亡命為爭雄

爭訟多在嬰童

臺灣客到應重洋鹿耳門前驗稟詳半路風濤何處泊  
澎湖死在水中央

兩島消平四十年田橫墓草久荒烟白頭賓客何人在

猶記興衰海上篇

鄭國姓三代事有人記之甚詳

海潮朝夕到城邊應月隨時遞換遷流水無心成往返



那能稱意兩來缸

臺灣開闢海南洋種蔗為生多販糖自古未遵王化地

今歸版籍是名邦

漳城三破慘兵戈四十年來生聚多當日骷髏收百萬

誰人首禍失天和

周櫟園作監司日埋骷髏十萬

山枕孤亭城倚山四圍屏列翠如環雙溪帶郭朝宗去

萬戶炊煙擁市闌

國姓三傳兩島平託名忠義盡虛聲當時本少思明意

故擁藩王似子嬰

廈門鄭氏名為思明州。明魯王于康熙二十二年破臺厦沉水死

海澄邑小號巖疆白浪翻天壓石墻砲匝女墻兵滿萬

當年曾此釣侯王

戍兵寥落嶺頭居暴客來時竊嘆噓點火烹茶無足用

臨行睨視一軒渠

瓜期歲換戍臺兵盤據驕騫屢易名安得營州為將帥

旌旗壁壘盡新更

天水微茫接遠空神山何處古難通蜃樓海市難常見

但有朝朝暮暮風

颶風忽起挾雲雷屋瓦飛騰樓閣頽海不揚波傳父老

由來德盛可彌灾

漳郡東南文獻邦典章散失老成亡誰攜祿筆脩遺誌

此意山高共水長



懷舫詩別集卷之四

鴈字迴文三十首

首尾悉和姑溪邢喬若原韻

一東

重重碧落掃晴空  
湛露秋毫霜夜中  
胸蘊文光瞻極紫  
筆生花彩映霞紅  
鋒藏樹外烟疎淡  
月掛林邊字拙工  
龍鳳飛成形舞躍  
濃雲繞墨起紗籠

二冬

籠紗起墨繞雲濃  
躍舞形成飛鳳龍  
工拙字邊林掛月  
淡疎烟外樹藏鋒  
紅霞映彩花生筆  
紫極瞻光文蘊胸  
中夜霜毫烁露湛  
空晴掃落碧重重

三江



誰擬高文鴻鼎扛禿毫煠老欲心降移來鳳詔裁雲五  
換得鶯經鈎墨雙姿態生花簪美女雪霜傳信望遙邦  
時乘興起塗鴉亂持字錦歸懷暮江

四支

江暮懷歸錦字持亂鴉塗起興乘時邦遙望信傳霜雪  
女美簪花生態姿雙墨鈎經鶯得換五雲裁詔鳳來移  
降心欲老煠毫禿扛鼎鴻文高擬誰

五微

餘煠奮筆運霄飛墨翰成空留素微初自作詩唐島瘦  
久經學字宋蘇肥舒毫兔起聯明月滿壁雲來寫落暉  
書契開時神鬼泣如何問世著名微

六魚

微名著世問何如泣鬼神時開契書暉落寫來雲壁滿  
月明聯起兔毫舒肥蘇宋字學經久瘦島唐詩餘自初  
微素留空成翰墨飛霄運筆奮煠餘

七虞

溪澄鑒影浴溪湖結字高峰清興孤低繫書辭傳武皓  
遠遊客國列張蘇梨園落雨寒題咏月夜縈絲錦叙鋪  
鷄犬昇空飛錄紫携提兩翼振仙鳧

八齊

覓仙振翼兩提携紫錄飛空昇犬鷄鋪叙錦縈夜月  
咏題寒雨落園梨蘇張列國客遊遠皓武傳辭書繫低

孤興清峯高字結湖溪浴影鑒澄溪

九佳

裁箋錦字綺雲排得句佳時四序諧才賦天人高嶽斗  
舞成鸞鳳結倫儕開花一筆夢長晝炫色千霞落小齋  
來往如文迴折轉埃塵絕跡著奇懷

十灰

懷奇著跡絕塵埃轉折迴文如往來齋小落霞千色炫  
晝長夢筆一花開儕儕結鳳鸞成舞斗嶽高人天賦才  
諧序四時佳句得排雲綺字錦箋裁

十一真

曠落書空揮黯塵嶺高幾遍寫詩新分章半歲記寒煖

合曆千年隨餞賓文印雪踪鴻似幻嶺橫雲篆鳳如真  
軍傳羽檄飛烽塞勤苦愁音寄遠人

十二文

人遠寄音愁苦勤塞烽飛檄羽傳軍真如鳳篆雲橫嶺  
幻似鴻踪雪印文賓餞隨年千曆合煖寒記歲半章分  
新詩寫遍幾高嶺塵黯揮空書落曛

十三元

觀海奇文雄勢奔碧空書字有痕捫寬懷吟雪盟梅友  
短翥揮風弄竹孫搏翼彩雲生變態滿毫沾露湛弘恩  
丸輪小看雙烏兔翰運飛鵬爲大鯤

十四寒



鯤大爲鵬飛運翰兔烏雙看小輪丸思弘湛露沾毫滿  
態變生雲彩翼搏孫竹弄風揮翥短友梅盟雪吟懷寬  
捫痕有字書空碧奔勢雄文奇海觀

十五刪

烟霞有句好增刪渺渺愁歌夜渡關鐫字麗雲開智慧  
著文元象警愚頑便便鼓腹吟鬚斷吐吐書空對髮斑  
懸月斜行成綺錦天人淨界法書閒

一先

閒書法界淨人天錦綺成行斜月懸斑髮對空書咄咄  
斷鬚吟腹鼓便便頑愚警象元文著慧智開雲麗字鐫  
關渡夜歌愁渺渺刪增好句有霞烟

二蕭

郊晴起草一羣超榜掛僊靈奇字描朝月秋霄清興暢  
御風春日麗文飄巢由寄隱龍章聞管籥協歌鳳律調  
饒致高懷舒翰彩鮫梭濡墨織輕綃

三肴

綃輕織墨濡梭鮫彩翰舒懷高致饒調律鳳歌協籥管  
閣章龍隱寄由巢飄文麗日春風御暢興清霄秋月朝  
描字奇靈僊掛榜超羣一草起晴郊

四豪

訛傳勝事記遊遨雨雪紛飛集澤舉過處晴光烟與月  
寫來愁句雅同騷多情客倦賦長漏斷夢香殘揮短毫

何若鴉羣栖靜夜波文細作枉心勞

五歌

勞心枉作細文波夜靜栖羣鴉若何毫短揮殘香夢斷  
漏長賦倦客情多騷同雅句愁來寫月與烟光晴處過  
準潭集飛紛雪雨遨遊記事勝傳訛

六麻

行行字到寄山家樹遠留烟暮噪鴉章彩映霞紅日近  
濛文沉水碧峰斜藏雲幻跡鸞兼鳳急雨衝飛龍逐蛇  
揚武高空長陣結黃元炫色煉皇媧

七陽

媧皇煉色炫元黃結陣長空高武揚蛇逐龍飛衝雨急

鳳兼鸞跡幻雲藏斜峰碧水沉文濛近日紅霞映彩章  
鴉噪暮烟留遠樹家山寄到字行行

八庚

停機倦賦遠人征小閣空傳愁怨聲螢照細書成錦織  
頽囊終老欲心驚丁年惜日秋毫濡丙夜衝寒霜字橫  
靈蹟開天昭濛麗形殊巧舌鼓簧鶯

九青

鶯簧鼓舌巧殊形麗濛昭天開蹟靈橫字霜寒衝夜丙  
濡毫秋日惜年丁驚心欲老終囊頽織錦成書細照螢  
聲怨愁傳空閣小征人遠賦倦機停

十蒸



秋清得意逞書能古調長歌和友朋頭白自憐常雪卧  
眼青爭路捷雲騰游絲綴尾增文麗舊稿藏山迷霧層  
稠疊墨花風洒洒留名塔上獨高登

十一尤

登高獨上塔名留洒洒風花墨疊稠層霧迷山藏稿舊  
麗文增尾綴絲游騰雲捷路爭青眼卧雪常憐白白頭  
朋友和歌長調古能書逞意得清秋

十二侵

南峰障字錦裁侵寄得書時浮與沉談客肆游常脫穎  
別離成賦有豪吟三山紀日閒來往滿澤悽心愁黯淡  
函達遠邊秋寂寂酣餘趁夢往追尋

十三覃

尋追往夢趁餘酣寂寂爍邊遠達函深黯愁心悽澤滿  
往來閒日紀山三吟豪有賦成離別穎脫常游肆客談  
沉與浮時書得寄侵裁錦字障峰南

十四鹽

鏡長共筆載留淹避地隨時遠暑炎巖接霜霄騰足捷  
霧披風翮運錐銛凡庸警字觀踪跡卦畫懸圖著揲占  
緘發神靈義繼禹芟除近體陋纖纖

十五咸

纖纖陋體近除芟禹繼義靈神發緘占揲著圖懸畫卦  
踪踪觀字警庸凡銛錐運翮風披霧捷足騰霄霜接巖

炎暑遠時隨地避淹留載筆共長鏡

咏鴈字極難限以韻脚更難重以迴文首尾俱限韻

難中之難也運以錦梭織成巧製當自為一集以誌

詞場佳話 沈確士評

懷舫詩別集卷之五

蠅

公族何煩風雅傳鷄鳴而起已翩翩集羶逐臭應休矣  
涅白奪朱竟漠然擲筆書生成底事穴窓學士結何緣  
獨傷去國憂纔客三復詩人愷悌篇

蚊

利口長舌譖暗侵飛而食肉性行陰常沾鳥喙生人血  
忽奮紅顏死節心潛入幕中充隱客羣來洛下亂孤吟  
逐臣澤畔憐憔悴肥貴人間別向尋 肥貴人出素問

螢

露墜雲流夜已深螢燈來照不眠心成堆消蠟憐當日



垂老讀書惜寸陰腐草違陽仍耿耿寒灰撥火竟沉沉  
無明明盡明無盡擬共雙丸耀古今

蛛

莫羨垂綸渭水邊當門藉爾謝時賢如天張網何妨漏  
似繭抽絲亦可憐飛絮落花皆繫累輕塵微露本虛懸  
須知不如還無吐息盡經營自宴然

鬪蟋蟀

餐風吸露本無爭身世相忘足養生儘可藏舟歸澗壑  
何須賈勇事縱橫蕭涼時令存同調浩渺秋容久自平  
莫作穴中兩虎鬪相殘會見一先傾

鬪鷓鴣

來自田間短褐衣忽橫長劍說兵機秋高風勁雄心起  
食野栖葭素願違血戰雖多功績少稻粱難索羽毛稀  
主人何日憐牛馬歸放閒身隴外飛

鷓鴣有帶劍  
插花各名

鬪鷄

連栖塹上共溫寒誰遣登塲構釁端敢死無勞施鐵距  
成功不肯受纓繁身先兩翼前無敵血漬危冠戰未闌  
一旦衰疲成棄肋何如舊作木彫看

鬪魚

元黃龍血溢溝渠勝負無常嘆老漁從此江湖雄戰國  
不須行陣攷兵書異同詰難先莊惠恩怨成心效蠶胥  
若使功名到烟水吾知人類久爲魚

繭虎

用梅村先生原韵

如姬纖手弄兵符履尾拈鬚點翠珠忽縛使君歸窹室  
姑寬令尹入綵厨烟銷香霧窺全豹雲擁巫山負一隅  
從此紅顏生羽翼柔鄉欲老更躊躇

窹室一名窹室

茄牛

秋圃風霜集牡丹太牢饁餉佐盤餐灌園月夜聲無喘  
登俎賓筵體自完非角為犧成享少覺鐘乏血入編難  
千頭搯割皆披導始信庖丁游亦寬

蜚鶴

枯骸胡然羽化輕纔辭涸澤更霄昇令威帶蛻來滄海  
子晉乘鰲返玉京鴻漸為儀原骀駢鵬飛求侶是鯢鯨

攀鱗

附翼皆卑論能識鳶魚見幻形

蟬猴

曾聞頒瑞到羊頭近見貂冠冠楚囚喜尔忘言叨厚祿  
相君無骨得通侯弄丸爵晉功多幸執矢身亡命不尤  
獨有狙公稱巧幻神仙封拜竟雙收

祿代露幻代宦

蘆筆

文心雷雨啟萌芽月色風光燦作花惟許三湘題蕙茝  
何堪五鳳繪雲霞閒摹奇字來元閣雜採龜毛問作家  
近日中書公老秃會須宣拜到蒹葭

橘燈

夜遊秉燭洞庭中彩炬千枝燦晚風烈澤焚山驚鳥獸



煎膏剜肉樂兒童絳帷半掩書燈耿祇樹雙懸佛火紅  
欲擬慧珠生內照澄潭印月一心空

菟船

坳堂盃水悟泡漚便溯仙源得故丘斧鑿逢人開渾沌  
根芟入世誤雕鏤蹄涔酣戰伏波績簷溜高牽上瀨游  
我欲揚舲星漢去逍遙九萬一虛舟

蓮蓬人

拂袖沾裳秋露寒蕭涼不著進賢冠獨存舊制官儀古  
已折孤標直幹難君子襟期惟朴素野人風味足盤桓  
幻身與世相遊戲姑作逢場傀儡看

曆

展卷如天度正長包涵今古閱興亡  
半部炎寒判兩行看去幽明生死見  
家頒戶誦無人識祇是空空沒字章

律

誰知古樂與聲通譯語方言共一中  
生子娶妻皆定象  
旋天轉地互為宮炎歆青女吹寒玉  
冰雪紅兒舞惠風  
若使人間無怨曠君王喉裡得黃鐘

器  
即物

日月雙懸著大明浮流河漢結星精  
乾坤顛倒山川見  
水火交關金木生樹石豈無飛躍意  
風雷能和鳳麟聲  
人身萬類皆全備儀鼎何須設象形

道

本鮮名形無始終聖人和用體常中老聃隱索元珠暝  
釋氏虛傳薪火紅生滅皆空天地息義仁盡廢暑寒窮  
命天率性仍修道教學人間大有功

藥名詩

春潮朝惱腦亂寄江姜隈煨堤岬青蒙礫莢杏開每愛

艾絨茂拈纏巨勝不甘草鬪罰蘭煤王孫久爽當歸約

絃无索空傷遠志懷續斷城西犀角韵起落花聲生裡

醉香醅春

梅實垂垂垂半夏前高槐葉落麥黃連威靈儂掌承丹液

冰覆花枝舞玳代筵鹽啼木綿棉蠻啣露鹿草洗桐子

細汲瀾泉甘瀾水呼兒茶罷青精熟飯飽從容夜合眠

夏

深秋石冷綠鹿苔胎焦百草霜寒橘柚彫竹葉杯前胡

不醉菊花開後厚頗朴無聊西河車騎防烽風急北地

榆關握雪遙握雪遙之石名梔子空隨書蠹老忽騰遠志上

烟霄硝烟草能止血

舊柏游油羣訝白頭翁榮瘁人身參草木通丹桂枝飄

霜薤白歸鴉片帶暮山紅山植一名一天冬景空青外

滿地黃花浪蕩中欲訪赤松子共處雲零零羽化自然

同冬銅

閱世詩八首



錄出附  
於諸稿

人生聚散復何常况值萍踪遇宦場絀盡聰明方有益  
渾此同異更無妨豈真世醉君獨醒為甚他閒你自忙  
畱下情緣在死後冤仇省却開閻王

江河日下決堤防和順應知策最良自是量弘才乃大  
若然機險禍終長圖名竟爾為名敗好勝終須鬪勝傷  
休說漢唐朋黨事喪身累友國淪亡

進學童生喜不了尚書告致惱難休華亭鶴記生平事  
上蔡犬悲往日遊豈止文章為芻狗寧貪榮利作犧牛  
孔明若曉其中理早效張良辟穀遊

何苦憂愁過一生祇思美利與榮名金戈相傍傷人物

臭腐為官感夢形積厚多崩常聚散登高易墮互虧盈

今朝貧賤君休恨得福雖輕禍亦輕

錢之為字金傍雙  
戈先相國之訓也  
夢屍得官  
出莊子

纔聽流鶯又聽蟬雙丸飛跳送華年忙中負却閒風月  
好處丟開古聖賢尤悔漸多心漸苦求謀難厭命難延  
一朝客散人捐館萬緒千頭總寂然

戚里身亡錮後昆北門金盡墓碑存輸贏奕局枯心血  
功罪春秋嚇鬼魂可惜眼明心轉暗那知身去孽空存  
爭權費盡千般計若個常能虎子孫

從來作偽更心勞多笑爭如少笑高富貴不由機巧得  
輕浮未許祿名叨華靡春長秋殘草恩寵寒侵煖棄袍

看得一身如一物顯藏榮瘁任囀囀  
好席曾無不散時老彭八百有終期龜齡鶴筭誰云貴  
夕死朝聞聖所奇地獄天堂皆誕妄神山大藥亦歎癡  
生吾順事歿寧也此是人生七字師

懷舫詩別集卷之六

江南竹枝詞 有小引

一麾嶺外常作莊吟三黜江濱聊爲梁甫白頭有客  
難追杜老七歌黃壤無依豈發梁鴻五噫賦蟋蟀草  
蟲之句意托風人招子山何遜之魂心傷逝者况六  
朝之流風遺韻猶存堤柳庭花憶廿年之擊楫垂鞭  
多是楚些吳咏滄波碧巘毫端頗富山川廢寺荒墳  
眼底欲空今古海棠嘉樹須教笛句於斯黃鶴仙樓  
莫評題詩在上牙排已卸安能詞撰迴波王霸非關  
那復聲聞控角效楚大夫之美人香草盡入離騷博  
諸君子之玉茗金樽平添旗鼓自晒紅兒世少徒勞



終夜比成還知白也敵無莫惜百篇草就竹枝歌待  
和白雪調爭傳

隋家金線禿千年殿角清謳譜失傳黃葉亂飛征客路  
滿堤風雨散荒烟

烟雲無際認迷樓菱盡瓊花月尚留獨照寒砧敲暮夜  
滿城霜氣一天秋

玉鈎斜畔草凝烟黃土常埋絕代妍金梳何曾留地下  
柔魂早已散風前

廿四橋頭佳麗重客停鶴駕醉穢穠揚州三月烟花少  
冷落天寧古寺鐘

梅老吟無何水部駟來人避杜樊川白鹽早掣歸銀甕

紅粉徐求列綺筵

平山不到漫多時常誦襄陽米芾詩淡墨遠天誰着眼  
紫霞還是染燕脂

曾共同寮暫一遊喧闐担子馬輿稠淮南迎客皆穿補  
山衲談詩近打油

輿前引導者謂之担子

朱欄翠幕小舟橫碧水青莎淺復清送酒催詩皆不足  
燕姬越女渺無形

揚子橋邊春水多離宮雲鎖戶蛛羅忽聞梵響高旻寺  
驚醒從遊往夢訛

寶塔燈懸照紫霄青波春漏夜迢迢宮中欲演新歌舞  
苑外如聞玉步搖

過江風景節并幽妓髻高梳號鳳頭玉手琵琶拈撥處  
一聲西調古涼州

画手琴師白相行曳裾懷刺謁網商高門懸簿從容到  
先見豪華安二郎

埂子橫排百貨攢驛行招客盛盤餐携歸低貨人情薄  
顧得癆驢行路難

高歌痛飲執鞭夫不放花間春興孤雲雨纔收塵土起  
襄王殘夢到登塗

驛夫能隨走隨睡

画船彩鷁儘光輝輕快何如草上飛朝往暮回催客去  
夜來蓬底是鴛幃

由來河朔飲粗豪邗上新歌節節高舞罷亂敲柳子響

秦聲驚落廣陵潮

瘦馬難求骨駿奇柔腸餓斷性終癡忽傳才女千金價  
能記風輕雲淡詩

玉人何處憶簫聲散入雙城風露清孤客推篷中夜望  
二分明月十分情

瓜洲江水繞城闌潮去潮來歲月新日日靈旗吹古廟  
年年簫鼓賽龍神

一片旗懸報好風棹檣千扇起江東新開漕路銜梢入  
羣頌堯仁繼禹功

漕渠不由舊油閘沿瓜洲城砌石開道

滄海日摩浮玉塔紫霄雲護妙高臺滔滔江湧孤峯出  
鼎鼎山鳴萬乘來



三排水勢一山分暮鼓晨鐘兩岸聞常說魚聽春曉梵  
更傳龍宿海堂雲

閒雲深鎖樹重重霧霧藏形處士峯春送來山多野鳥  
月邀過澗有枯松

仙人養拙在何方豈到人間管夢場縱使分明如面語  
醒時前路自茫茫

滄洲遣興泛莎汀鈎得沉江瘞鶴銘痛惜碑陰書盡剝  
令威雖返翅凋零

質鼎原因胎袖舍山僧好事說周王寺殘山僻高人意  
却賄何堪入上方

千秋北固江山古六代南朝勝蹟多依舊羣山圍鐵甕

焦山寺銅鼎乃嚴分宜子世蕃之物  
王弇州家因此得袖嚴殿舍入寺中

難將流水返金戈

粉堞連山壓墨雲吹茄城郭帶殘曛樓船銀海分旗隊

禁旅防江駐馬軍

蒜山形勢本迢遙曾此陳兵萬騎驍石笋訛傳從古有

一拳想是蒜山苗

蒜山甚大歷經屯兵今指江邊  
一笋曰蒜山乃俗傳失實也

傳聞抱樸葬江心龍護鰲擎玉不沉錢鳳筭來終一死

道明順逆勝仙禽

仙禽謂青鳥錢鳳乃王敦用人

環郡皆山面面青人無登眺戶常扁窓間雨後全邀入

不厭相看是敬亭

正江人皆  
不好遊

烟草難尋寶晉齋上皇樵子識茅柴

名酒

可憐良嶽成灰

土花石平泉枉繫懷

幽境郭南招隱寺歷無官到怕休官山靈自不留塵駕  
姑射城頭笑蕊寒

劉毅孤貧喪志行袒肩一擲萬金輕至今博者皆稱道  
先悞牢之親外甥

石能蓋劍說荒唐依樣葫蘆画柏鄉柏鄉北有光武斬石人事因此

並疑芒碭事白蛇自斬本無娘

彎弓間射江頭月奮筆橫生足下雲胄子賦詩兼舞槊

將軍好武也談文

籌時海運說難通輸輓長番賦二東倉庾朽紅宜間減

謂宜間一年或減三五分也準平食貨古今同

望陽重累是挑河潮去潮來似織梭天遣波臣輸貢米

脂膏柱墊雪冰窩

梅花柳色古朱方水驛山亭去路長潮湧扁舟風送客

丹塗纔過早丹陽齊慶封奔吳吳封之於朱方即今丹徒

丁卯橋邊水細流陟山湖外稻花秋青田白鷺斜陽岸

殘月曉風畫舸樓

潭空龍隱雨雲荒秋入離宮草樹黃鶴髮翁來悲繡嶺

瀟湘竹在鎖連昌

漢家坏土久分崩過客猶稱下馬陵皇覺寺中能悟徹

大白牛駕最高乘西京蝦蟇陵本為下馬陵人傳明祖像誌公化身

門啓朝陽沙路平牛車塞道載柴荆架鎗繫馬安堆子

却認陪都是盛京



行人路出小東門  
宮殿成灰瓦礫存  
甲士弓刀材猛銳  
將軍笳吹勢雄尊

中山開國建名園  
石裂池荒大樹翻  
奕代功勳歸草莽  
更無人識故侯門

憲府尊嚴制兩江  
重臣簡畀鎮茲邦  
雨餘綠野多驅犢  
月下花村少吠尨

三山街上承恩寺  
聚寶門中文定橋  
四顧繁華無五里  
千門萬戶盡蕭條

絕少笛吹桃葉渡  
久無燕到莫愁家  
秦淮月夜聞歌吹  
羯鼓催開兩岸花

秦淮燈船大鼓節歌  
南朝五百知名寺  
半化丘墳半野園  
佛閣成塵鐘卧地

菜花開遍紙錢翻

雜還長千車馬聲  
麗人春晝出傾城  
報恩塔上添油去  
點着佛燈眼倍明

市樓十六建明初  
妙選聲容舊院居  
南陌多添蘇小墓  
故家爭重馬湘書

試院門前淮水通  
隔河便是藥珠宮  
狀元歸馬攜春色  
喜看仙花一捻紅

貢院隔河即舊院  
雪霽江頭未減寒  
迎春千騎擁臺端  
雲中花雨無餘朵  
山際朱纓有萬盤

兩花臺迎春時山上紅纓帽是一大觀  
王概武丹名浪傳  
高家筆致欠天然  
櫟園樓廢誰知讀  
散失襄陽書畫船

少陵遺老號茶邨身死渾無誌墓孫大布深衣封不樹  
誰人知弔古詩魂

竹樹西郊爽秀開湖邊隨意有亭臺樓中豈少盧家婦  
誰暇扁舟載酒來

承恩精舍客居停院窄墻高雜市聲何不避喧甘執熱  
貪看侍立小童清

樓閣峻嶒古冶城山光湖色暫將迎非來嵩祝觀雩舞  
誰肯偷閒冷處行

清涼山畔晉梁墟春樹花開億萬餘想為東南繁盛極  
故教錦繡補天虛

元鳥來時江水春啣花剪絮更撩人雪中若上山巔望

白燕梨花映鬢銀

江寧近城景以燕子磯為最

江流中貫呂蒙城蒙死千年墓久平里老修祠祀杜繆  
廟基壓骨事堪驚

昔人掘地得僧屍忽化為牛東向馳今日奔牛驅牧者  
毋將痛棒打禪師

季札城高枕水濱疆連秦伯祖孫隣延陵酒美無人贈

且買粗麻驛市中

麻巾著名秦伯城在無錫

蔚蔚龍山紫翠連秦園聞已蕩荒烟來遊佳客煩襟滌  
首問孤亭第二泉

戚堰橫林江幾灣迎人隱隱是龍山社神廟小香燈盛  
不及墻西散木閒



沿江水驛傲花夫寒暑牽舟口藉餬赤脚踏歌豪蕩甚  
高賢疑爾隱漿屠

平江千里水滔滔密設關津上下牢川峽中水令尹元

文全不識老君攔住拔牛毛

寒山寺外客船縻楚米川梁幕幕施夜半鐘聲今不起

僧伽拈碎野花枝

虎丘石路接山塘七里三橋衆妙香高柳垂陰遮酒館

佳人結隊入僧堂

中秋明月虎丘多酒舫燈船塞滿河入寺笙歌無隙地

恰如雪夜蔡州鷺

採藥逃名雍仲國吹簫興霸王門城高似表周三讓

壽響猶思越併吞

泰伯有國傳弟雍仲太王死季歷以國讓伯仲者三故論語云三讓俱見

吳越春秋

范蠡何功得祀吳祭非其鬼太糊塗郢亡尚有包胥哭

越霸王傳伯嚭誅

胥江分派入支硎雨後飛來佛頂青水畔麗人遊洛女

河源使客泛槎星

高士宅留千尺雪法螺庵擁萬株花是紅深淺皆堪愛

祇為春光本有涯

慈雲一片覆春陰豔藥嬌枝繞碧岑到此春光更燦爛

入山原要入山深

懊惱當年湯使君上方山路塞重雲春遊渾未舒蓮步

已見歸鴉散落暝

姑蘇臺作梵王宮鐘鼓音傳曉暮風響屨幾聲雲散盡  
錦衣一閃電歸空

鄧尉山中百萬梅春寒常伴杏花開遊人如蟻輕攀折  
詩賦誰方向宋才

百花洲上糞香幽自昔中郎已倦遊金汁灌田多獲稻

名花傾國恐生愁

見袁集中

專諸巷鮮俠游客古董行多作僞人女解承恩非在貌  
物能得價便為真

昔時白傅留詩卷今日香山剩酒船散盡黃金無死士  
殺成歌舞有昇仙

胥關爭買好鰾鮑老盡當鑪酒肆存黃四娘家花已卸  
嬌鶯戲蝶傍誰門

閭閻缶甑易生塵逐末雖多不救貧未滿十家三酒店  
近開茶肆更鮮新

螞蟻兇頑聚一堆良材遭遇刻成灰貧家養得如花女

盡被蛆蟲嚼出來

蘇媒人名白螞蟻

舟輿曉暮看容光珠髻花衫錦繡裳養住媒家粧束就  
買成祇剩玉溫香

吳兒五歲便從師學唱千金百順詞但得邀金隨所往  
走燕奔越返無期

生成兒女性聰明習舞教歌百技精春色常留鶯燕在



藍關雪擁路難行

滄浪亭子枕城南傍水樓臺影靜涵遷客懷憂求自勝

靜能制動孰深耽

王府基荒草亦枯張家兄弟販鹽徒金飈蔡葉黃乾癩

誰料天風又蕩吳

張士誠時有黃蔡葉三人用事民謠云一朝西風來黃蔡葉乾癩蓋明祖

時稱吳王住江寧也

觀裏仙人蓋玉棺風雷猶降舊齋壇門標祝誦黃冠客

祇騙喪家一飽餐

三江分派越婁門望裏烟埋齊女墳更起一峰青滿縣

定知地脉接崑崙

州治元時建巨倉神輸鬼運有朱張津門浮達三宵晝

破浪乘風萬里長

澤國魚鹽厚貨財長年得意海中回落帆下錠瀏河口

先祀天妃戲一臺

牲醴酬神高起檣風潮夾逼渡滄茫

渡海必用風潮夾持東風行落西風

也行漲廖高嘴外龍三窟花鳥山前雁幾行

洋花鳥山在江浙分洋處

十年滄溟泛槎臣閱歷風濤雙鬢銀二十四回逢海若

神山何處是通津

崇城五徙築長沙

崇明建城處號長沙

帥府風雲建纛牙廢署鼓

吹餘兩部私哇聲壯啞公蛙

有言余未至崇者

田號蒙金塗覆沙四分稻麥六分花葡萄苜蓿皆無用

奇種調飢有地瓜地瓜來自閩中

樓船破賊傳岐鳳崇鎮梁化鳳陝西人順治已亥年破海寇居守功高有一

龍梁鎮赴江寧賊回船上岸憤恨攻城去也漸入舟山平鷺

島廈門名臺澎從此展堯封

一身去國三千里兩度游吳二十年娛老苦無歸着地

題詩寫遍水雲天

皇華陳採豈吾儕物候隨時蟲韻諧軼事方言登野史

莫譏詞賦類優俳

楊鐵啞有西湖竹枝辭三十餘首一時和者甚衆然

只流連光景而已百詠瑣事俚言幽情豪興彙而成


詩凡風土民俗盛衰得失一一寓焉讀去有秦箏羌

笛之韻有秋笳塞角之聲使聞者醉心悅耳感激豪

宕覘治忽者可備考鏡不第與鐵崖較短長也長洲後學

沈德潛跋





中  
九  
言  
光  
文  
考  
二

二

